

**ಪೌಲನು ಥೆಸಲೋನಿಕದವರಿಗೆ ಬರೆದ
ಮೊದಲನೆಯ ಪತ್ರಿಕೆ
ಪೌಲನೆ ಥೆಸಲೋನಿಕವಾಳಾನ ಲೀಖ್ಯೋತೆ
ಪಹಿಲಿ ಚಿಟ್ಟಿ
ಮಾಲುಮ್ ಕರಾನು**

ಅಪೊಸ್ತಲ ಹುಯಿರೋತೆ ಪೌಲನೆ ಲೀಖಿರಾಖ್ಯೊಸ್. 1:1 ಆ ಚಿಟ್ಟಿ ಧರ್ಮಶಾಸ್ತ್ರನಿ ಏಕ್ ಭಾಗ್ ಹುವಾನ ಪೌಲನೆ ಲೀಖ್ಯೋತೆ ಪಹಿಲಿ ಚಿಟ್ಟಿ ಹುಯಿರ್ದೇವ್ಣಕರಿ ದೇಖವಸ್. ಅಜ್ಜು ಆ ಚಿಟ್ಟಿ ಘಣೇಥಿ ಯೇಸುಕ್ರಿಸ್ತ ಪೈದಹುಯಿನ್ 51 ವರಖ್ವನಿ ಬಾದ್ತಲೀಖಾಯು. ಪೌಲನೆ ಥೆಸಲೋನಿಕ ಸಬೆನ ಆ ಚಿಟ್ಟಿ ಲೀಖಾನಿ ವಖ್ವತೆ ಕೊರಿಂಥಮ ಥೊ, ಆ ಇನು ಬೇನು ಸುವಾರ್ತೆನ ಭಾವಾನಿ ವಖ್ವತೆ ಸಬೆನ ಭಾಂದಿರಾಖ್ಯುಸ್. ಅಪೊ 17:1-10 ಆ ಸಬೆ ಥೋಡ ಯೆಹೂದ್ಯರ್‌ನ ಅಜ್ಜು ಕೈಏಕ್ ಗ್ರೀಕ್‌ವಾಳಾನ ಲೀನ್ ಭಾಂದಿರಾಖ್ಯುಸ್ ಕರಿ ಅಪೊಸ್ತಲನು ಕಾಮ್ನ ಪುಸ್ತಕ್‌ಮ ಬೋಲ್ಪಿರ್ದುಸ್.

ಆ ಸಬೆ ಭಂದೈಹುಯುತೆ ತದೆ ಘಣಾದನ್ ಥೆಸಲೋನಿಕಮ ರ್ದವಾನ ಪೌಲನ ಕೋ ಹುಯುನಿ. ಇನಖ್ವಾಜೆ ಇನೆ ಹಿಜ್ಜಾರ್ದೈಯಿತೆ ವಿಶ್ವಾಸಿಖ್ವಾರನ ಹುಮ್ಮಖ್ವ್ ದೈವಾನಖ್ವಾಜೆ ಆ ಚಿಟ್ಟಿನ ಲೀಖಿನ್ ಮೋಕ್‌ಲ್ಯೊ ಆ ಚಿಟ್ಟೇಮ ವಿಶ್ವಾಸಿಖ್ವಾರು ಕಿಮ್ ಜಿವ್ವುಕ್‌ರನ್ ಕರಿ ಕೈಏಕ್ ವಿಚಾರ್ನ್ ಮಾಮೂಲಿ ಸಬೆ ಅಖ್ವಿಲ್ಲಾ. ಇಮ್ಮಸ್ ಪೌಲನೆ ಕ್ರಿಸ್ತನಿ ಬೇನಿ ಆವಾನಿ ಬಾರೇಮ ಘಣಿ ನಜರ್ ಕರಿರಾಖ್ಯೊಸ್ ಶನಖ್ವಾಜೆಕತೊ ಥೆಸಲೋನಿಕ ಸಬೇನು ಅದ್ಮಿಖ್ವಾರು ಆ ವಿಚಾರ್ನ್ ಬಾರೇಮ ಘಣಿ ಮನ್‌ಲಗಾಡಿನ್ ಥು. ಪೌಲನೆ ಕ್ರಿಸ್ತನು ಬೇನಿ ಆವಾನಿ ಬಾರೇಮ ದೇವ್ನ ಖ್ವಾಜಾನು ಜಿವ್ವು ಜಿವಾನಖ್ವಾಜೆ ಹುಮ್ಮಖ್ವ್ ದೇಸ್. 5:6-8

ಕಾಡಿದೇಖೊ

- 1 ಪೌಲನೆ ಆ ಚಿಟ್ಟಿ ಸಬೆನ ತೋಬ ಕರಾನಖ್ವಾಜೆ ಅಜ್ಜು ಇವ್ವಖ್ವಾಜೆ ದೇವ್ವ ಧನ್ಯವಾದ್ ಬೋಲ್ತೊ ಹುಯಿನ್ ಶುರುಕರಸ್. 1:1
- 2 ಯೊ ಕರುಕರಾತೆ ಕಾಮ್‌ಖ್ವಾರು ಅಜ್ಜು ತಿಮೊಥೆನ ಲಾಯೊತೆ ಖಬರ್‌ನಿ ಬಾರೇಮ ಬೋಲಸ್. 2:1—3:13
- 3 ಇನಕೇಡೆಥು ಪೌಲನು ವಿಶ್ವಾಸಿಖ್ವಾರು ಯೇಸುನಿ ಬೇನು ಆವಾನು ದೆಖಾವ್‌ಶೇತೆ ಉಙ್ಗಾಳಾಮ ಜಿವ್ವುಕರ್‌ನುಕರಿ ಬೋಲಾನಿ ಬಾರೇಮ ಖ್ವಾಜ್ ದೇಸ್. 4:1—5:15
- 4 ಪೌಲನೆ ಬಿಜೇಕ್‌ಹಲ್ಲ ಆ ಚಿಟ್ಟಿನ ಸಬೆನ ಹರೇಕ್‌ನಾಬಿ ಪೂರ ಧನ್ಯವಾದ್ ಬೋಲ್ತೊಹುಯಿನ್, ಚಿಟ್ಟಿನ ಖರ್ತಿ ಕರಸ್. ಅಜ್ಜು ಸಬೆಮ ಫಡೀನ್ ಬೋಲ್ತುಕರಿ ಬೋಲ್ತೊಹುಯಿನ್ ಚಿಟ್ಟಿನ ಖ್ವತಮ್ ಕರಸ್. 5:16-28

1 ಬಾ ದೇವ್‌ಮಾಬಿ ಅಜ್ಜು ಪ್ರಭು ಹುಯಿರ್ದೊತೆ ಯೇಸು ಕ್ರಿಸ್ತಮಾಬಿ ಛಾತೆ ಥೆಸಲೋನಿಕ ಸಬೆನ ಅದ್ವಿವೋನ ಪೌಲ, ಸಿಲ್ವಾನಾಬಿ ಅಜ್ಜು ತಿಮೊಥೆ ಹುಯಿರ್ದೊತೆ ಹಮೆ, ಲೀಖಾನು ಶಾತ್‌ಕತೊ ತುಮೂನ ವಾರ್‌ಖೊಬಿ ಅಜ್ಜು ಶಾಂತಿ ಮಳಾದೆ.

ಥೆಸಲೋನಿಕವಾಳನಿ ವಿಶ್ವಾಸ್ ಅಜ್ಜು ಭಿಂದಂಗಿ

2 ಹಮೆ ಕದೇಬಿ ಪ್ರಾರ್ಥನೆ ಕರಾನಿ ವಖ್ವತ್‌ಮ, ತುಮೂನ ಯಾದ್‌ಕರಿನ್, ತುಮಾರಖ್ವಾಜೆ ದೇವ್ವ ಧನ್ಯವಾದ್ ಕರಿಯೇಸ್.

3 ಅಜ್ಜು ವಿಶ್ವಾಸ್‌ಥಿ ತುಮೆ ಕರ್‌ನಾತೆ ಕರಣ್ ಕಾಮ್‌ಬಿ, ಪ್ಯಾರ್‌ಥಿ ತುಮೆ ಕರ್‌ನಾತೆ ಮ್ಹಿನತ್‌ನಾಬಿ, ಅಪ್ಲೊ ಪ್ರಭು ಯೇಸು ಕ್ರಿಸ್ತಪರಾನಿ ತುಮಾರಿ ಭರೋಖ್ವಾನಖ್ವಾಜೆ ಅಪ್ಲೊಬಾ ಹುಯಿರ್ದೊತೆ ದೇವ್ವಖ್ವಾಮ್ಲೆ ಹಮೆ ಹಮೇಶ ಯಾದ್ ಕರಿಯೇಸ್.

4 ಹಮಾರ ಬೈ ಭೇನೊ, ದೇವ್ ತುಮೂನ ಪ್ಯಾರ್ ಕರಾಸ್ ಅಜ್ಜು ಇನು ಶೊಂತ್ ಅದ್ವಿಹುಯಿನ್ ರ್ವಾನಟೀಕೆ ಇನೆ ತುಮೂನ ಚೂಣಿರಾಖೊಸ್ ಕರಿ ಬೋಲಾನು ತುಮೂನ ಮಾಲುಮ್ ಛಾ.

5 ಶನಕತೊ, ಹಮೆ ಸುವಾರ್ತೆನ ಖಲಿ ವಾತೇಥಿಸ್ ಕಾಹೆ ಪಣ್ಣಿ, ಶಕತ್‌ಥೀಬಿ, ಪವಿತ್ರಾತ್ಮಧಿಬಿ ಅಜ್ಜು ಯೋ ಖ್ವಾಚಸ್ ಕರಿ ಹಮೆ ಪರ್ವಿನ್

ತುಮಾರಕನ ಲೈರಾಖ್ಯಸ್. ಹಮೆ ತುಮಾರ ಜೋಡೆ ಧಾತೆ ತದೆ, ತುಮಾರ ನಫ್ಫಾನಖ್ವಾಜೆ ಕಿಮ್ ಜಿವ್ವಕ್ಕರುಕರ್ತಫ.

6 ಪ್ರಭುನೆ ಅಜು ಹಮೆ ಚಾಲಿಲಿದಾತೆ ಇಮ್ಸ್, ತುಮೇಬಿ ಚಾಲ್ಯಾ; ಎತ್ರಿಸ್ ಕಾಹೆತೆ ತುಮೆ ಘಣು ಲತಾಡ ಖ್ವಮಾಳ್ಕಾತೋಬಿ, ಹಮೆ ಬೋಲ್ಯಾತೆ ಉಪದೇಶ್‌ನ ಪವಿತ್ರಾತ್ಮಧಿ ಪೈದಾಹುವಾಸ್ತೆ ಖ್ವಶಿಧಿ ಮಾನಿನ್ ಹಮಾರಿ ಸುವಾರ್ತೆನ ಖ್ವಮ್‌ಜಿಲಿದ.

7 ಅನೇಥಿ ಮೆಕೆದೋನ್ಯಮ ಅಜು ಅಖಾಯಮ ಕ್ರಿಸ್ತನ ವಿಶ್ವಾಸ್ ಕರಾವಾಳು ಖ್ವಾರ್ರು ತುಮೂನ ದೇಖಿನ್ ಶಿಕಾನಿಫೋಣಿ ಹುಯು.

8 ಪ್ರಭುನಿ ವಚನ್ ತುಮಾರೇಥೀಸ್ ಮೆಕೆದೋನ್ಯ ಅಜು ಅಖಾಯಮಾಬಿ ಪೈಲಿಗಯು. ಅತ್ರೀಸ್ ಕಾಹೆತೆ ತುಮೆ ದೇವ್‌ಪರ್ ರಾಖಿಮ್ವೇಲ್ಯಾತೆ ವಿಶ್ವಾಸ್ ಖ್ವಾರಿಸ್ ಬಾಜೂಮಬಿ ಪೈಲಿಗಯು. ಅನೇಥಿ ತುಮಾರಿ ವಿಶ್ವಾಸ್‌ನಿ ಬಾರೇಮ ಬಿಜು ಶಾತ್ವಿ ಬೋಲಾನಿ ಜರೂರತ್ ಕೊಯ್ತಿ.

9 ತದೆ ಹಮೆ ತುಮಾರಕನ ಆಯಾತೆ ತದೆ ತುಮೆ ಹಮೂನ ಖಿವಿ ತರಿಕಾಥಿ ಬುಲೈಲಿದಾಕರಿ ಆ ಅದ್ವಿಖ್ವಾರು ಬೋಲುಕರಸ್. ಅಜು ತುಮೆ ಮೂರತ್ವಪೂಜಾಥು ದೇವ್‌ಭಣಿ ಕಿಮ್‌ಫರ್ತ್ ಅಜು ಜಿವ್‌ತಜಾನ್ನ್ ದೇವ್ವ ಕಿಮ್ ಸೇವೆ ಕರ್ತ್ಯಾ ಕರಿ ಬೋಲಸ್.*

10 ದೇವ್ನೆ ಮರ್ತ್ಯಾಹುಯಾಮಾಥು ಉರಾಡ್ವೋತೆ ಅಜು ಸೊರ್ಗಮಾಥೊ ಆವ್‌ಶೇತೆ ಇನ ಛಿಯ್ಯಾನಖ್ವಾಜೆ ತುಮೆ ಟಿವವ್‌ಕರಸ್ ಕರೀಬಿ ಆ ಅದ್ವಿಸ್ ಬೋಲಾಸ್. ಆ ಯೇಸು ಖ್ವಾಮ್ವೆ ಉಳ್ಳಾವತೆ ದೇವ್ವ ಇರಾದಾಥಿ ಅಪ್ಪುನ ಬಚಾಡವಾಳೊ ಹುಯಿರೋಸ್.

2

ಥೆಸಲೋನಿಕಮ ಪೌಲನು ಕಾಮ್

1 ಹಮಾರ ಭೈ ಭೇನೊ, ಹಮೆ ತುಮಾರಕನ ಆಯತೆ ತುಮೂನ ಫಾಯಿದೊಕೊಂತೆ ಕೊಹುಯುನಿ ಕರಿ ಮಾಲುಮ್ ಛಾ.

* 1:9 1:9 ಮೂರತ್ವ ಕರಿ ಮತ್‌ಲಬ್.

2 ಹಮೆ ತುಮಾರಕನ ಥೆಸಲೋನಿಕಮ ಆವಾನ ಅಗಾಡಿಸ್, ಫಿಲಿಪ್ಪಿ ಖ್ವಿಯೇರಮ ಹಮೂನ ಕೆತ್ರೆ ಖ್ವಿತಾಯು ಅಙ್ಜು ಖ್ವರಮ್ ಕಾಡ್ಯ ಕರಿ ತುಮೂನ ಮಾಲುಮ್ ಛಾ. ಹಿಙ್ಜಾ ಎತ್ರೆ ವಿರೋದ್ ಕರೈತೋಬಿ ತುಮೂನ ಸುವಾರ್ತೆನ ಬೋಲಾನಟೇಕೆ ಅಪ್ಪೊ ದೇವ್ನೆ ಹಮೂನ ಭಾಲಿದಿದೊ.

3 ಹಮಾರಿ ಸಮಾಚಾರ್ ಹುಮ್ಮಖ್ವೊನು ಹುಯಿರಪ್ಪುಸ್. ಮೈಲುಬಿ ಕಾಹೆ, ಅಙ್ಜು ತುಮೂನ ರಗಾಪ್ಪು ಕರಿ ಕಾಹೆ.

4 ಅನಬದಲ್ ದೇವ್ ಕದೇಬಿ ಶನ ಲ್ಹಾಯಕ್ ಕರಸ್ಸಿ ಇನಾಸ್ ಅಪ್ಪೆ ಬೋಲಿಯೇಸ್. ಶನಕತೊ ಯೋ ಅಪ್ಪುನ ತರೀಪ್ ಶ ಕರೀನ್ ಹಮೆ ಯೋಗ್ಯಹುಯಿರಾತೆ ಅದ್ಮಿಕರಿ ಇನಿ ಅಲ್ಫಿ ಸಂದೇಶ್ ಇನೆ ಅಪ್ಪುನ ದೀರಾಪ್ಪೊಸ್. ಹಮೆ,ದಿಲ್ ತರೀಪ್ಪ ಕರಾವಾಳ ದೇವ್ನ್ ಖ್ವಾಜ್ನುಸ್ ಕರಿಯೇಸ್.

5 ತುಮೂನ ಮಾಲುಮ್ ಛಾತೆ ತಿಮ್ ಹಮೆ ಕದೇಬಿ ಕಿನ ಖ್ವರಾಯಬಿ ಕೊಯ್ನಿ ಅಙ್ಜು ಲಾಲಚ್ ನ ಲಪಾಡನಖ್ವಾಜೆ ವೇಷ ಫೇರೈಕೊಯ್ನಿ. ಇನ ದೇವಸ್ ಸಾಕ್ಷಿ.

6 ಎತ್ರೆಸ್ ಕಾಹೆತೆ ಹಮೆ ಕ್ರಿಸ್ತನು ಅಪೊಸ್ತಲರ್ ಹುಯಿರಪ್ಪಾತೆ ಇನಖ್ವಾಜೆ, ಹಮೂನ ಮಾನ್-ಮರ್ಯಾದಿನ ವತಾಳ್ಳು ಕರಿ ಬೋಲೆಜಾಯಿಧು. ತೋಬಿ ಹಮೆ ಅದ್ಮಿಧಿ ಮಳಾಸ್ತೆ ಮಾನ್-ಮರ್ಯಾದಿನ ತುಮಾರೇಧಿ ರಪ್ಪೊ, ಬಿಜಾಧಿ ರಪ್ಪೊ ಮಳಾದೆಕರಿ ಆಖ್ವೊಕರೈಕೊಯ್ನಿ.

7 ಕತೋಬಿ ಕ್ರಿಸ್ತಮ ಅಪೊಸ್ತಲಹುಯಿನ್ ಆಯ ಇನ ಲಡ್ಕಾನ ಖ್ವದರ್ ಕರಾತೆ ಇಮ್ ತುಮಾರಿ ಜೋಡ್ ರಪ್ಪಿತ ಲಾಡ್ಧಿ ಭಾಲಿಲಿದಾ.

8 ಶನಕತೊ ಹಮೆ ತುಮೂನ ಜಾಖ್ವತ್ ಪ್ಯಾರ್ ಕರೈತೆ ಇನಖ್ವಾಜೆ ದೇವ್ನಿ ಅಲ್ಫಿ ಸಂದೇಶ್ ಖಲಿ ಬೋಲಾನಟೇಕೆ ಕಾಹೆತೆ ತುಮಾರಖ್ವಾಜೆ ಜಾನ್ನ್ ದೈವಾನಾಬಿ ಹಮೆ ತಯಾರ್ ಹುಯಿರಾಸ್.

9 ಬೈ ಭೇನೊ ಹಮೆ ತುಮಾರಾಮ ಕಿನಾಪರ್ಬಿ ಭಾರೊ ನಾ ನಾಕ್ಳು ಕರಿ ರಾತ್-ದನ್ ಕಾಮ್ ಕರೀನ್, ಜಿವ್ವು ಚಲಾವ್ತಹುಯಿನ್, ದೇವ್ನಿ

ಸುವಾರ್ತೆನ ತುಮೂನ ಬೋಲಿವತಾಳ್ಳ, ಯೋ ಹಮಾರಿ ಲತಾಡಬಿ ಮ್ಹಿನತ್ ಖ್ಹಾರು ತುಮಾರಿ ಯಾದ್ತರ್ವಾದೆ.

10 ನಂಬವಾಳ ಹುಯಿರ್ದಾತೆ ತುಮಾರ ಜೋಡೆ ಹಮಾರಿ ಚಾಲ್‌ಚಲಣ್‌ಮ ಖ್ಹಾಚಿಥಿಬಿ ಪರಿಶುದ್ಧಬಿ, ನೀತಿವಾಳಬಿ ಅಜ್ಜು ನಿರ್ದೋಷಿ ಥಾ, ಕರಿ ಬೋಲಾನ ತುಮೇಬಿ ಸಾಕ್ಷಿ ಅಜ್ಜು ದೇವ್‌ಬಿ ಸಾಕ್ಷಿ ಹುಯಿರ್ದಾಸ್.

11 ಬಾ ಇನ ಶೊಂತ್ ಲಡ್ಕಾನ ಜೋಡೆ ಕಿಮ್ ಚಾಲಿಲೇಸ್ಕಿ ಇಮ್ಮಸ್, ಹಮೆ ತುಮಾರ ಜೋಡೆ ಚಾಲಿಲಿದಾ.

12 ಇನಿ ರಾಜ್ಯ ಅಜ್ಜು ಮಹಿಮೆಮ ವಾಟೊಲ್ಯವಾನಖ್ಹಾಜಿ ಬುಲೈರಾಖೊಸ್ತೆ ದೇವ್‌ಖ್ಹಾಮ್ಣೆ ಬರೋಬರ್‌ಥಿ ಜಿವ್ಣು ಕರ್ನ್‌ಕರಿ ಬೋಲಿದಿದಾ. ಆ ಅಖ್ಬು ತುಮುನ ಮಾಲುಮ್.

13 ಅಜ್ಜು ತುಮೆ ಹಮಾರೇಥಿ ದೇವ್ನಿ ವಚನ್ನ್ ಖ್ಹಮ್‌ಜ್ಯಾತೆ ತದೆ, ಅದ್ಮಿನಿ ವಚನ್ ಕರಿ ಸೋಚ್ಫುನಾತೆ, ದೇವ್‌ನೀಸ್ ಕರಿ ಮಾನೀನ್ ಇನಖ್ಹಾಜಿಬಿ ಹಮೆ ಲಗತ್ತರ್ ದೇವ್ ಧನ್ಯವಾದ್ ಕರಿಯೇಸ್. ಯೋ ಖ್ಹಾಚಮಾಬಿ ದೇವ್‌ನೀಸ್ ವಚನ್. ಯೋ ವಚನ್ ನಂಬವಾಳ ತುಮಾರಾಮ ಶಕಥಿ ಕಾಮ್ ಚಲಾವಸ್.

14 ಹಮಾರ ಭೈಯೆ ಭೇನೆವೊ, ತುಮೆ ಯೂದಾಯಮ ಕ್ರಿಸ್ತ ಯೇಸುಮ ಛಾತೆ ದೇವ್ನಿ ಖ್ಹಾಚಿ ಸಬೇನಿಮತ್ ಚಾಲಿರಾಖ್ಯಾಸ್. ಇವ್ಣೆ ಯೆಹೂದ್ಯರ್‌ಥಿ ಖ್ಹಮಾಳ್ಕುತೆ ಖ್ಹತಾಪ್ಪಿನ, ತುಮೆ ತುಮಾರ ಶೊಂತ್ ಅದ್ಮಿಥಿ ಖ್ಹಮಾಳಿರಾಖ್ಯಾಸ್.

15 ಇವ್ಣೆ ಪ್ರಭು ಹುಯಿರ್ದಾತೆ ಯೇಸುನಾಬಿ, ಖ್ಹಾರ ಪ್ರವಾದಿನಾಬಿ ಮರೈನಾಖ್ಬು ಅಜ್ಜು ಹಮುನಾಬಿ ನಖ್ಹಾಡಿಡಿದು. ಇವ್ಣೆ ದೇವ್ ಖ್ಹಾಜಾತೆ ಇಮ್ ಕರಾವಾಳು ಕಾಹೆ! ಅಜ್ಜು ಇವ್ಣೆ ತಮಾಮ್ ಅದ್ಮಿನ ಖೊಮ್ಮ ದುಶ್‌ಮನ್ ಹುಯಿರ್ದಾಸ್!

16 ಯೆಹೂದ್ಯರ್‌ಕಾಹೆತೆ ಅದ್ಮಿನ ರಕ್ಷಣೆ ಮಳಾದೆ ಕರಿ ಸುವಾರ್ತೆನ ಬೋಲ್‌ಯೇಸ್ತೆ ಹಮುನಾಬಿ ಭೀರಾಕ್‌ಣು ಕರಿ ಕರ್ನ್ಯು ಅಮ್ ಕರಾಥಿ ಇವ್ಣು ಪಾಪ್ಪು ಕಾಮ್‌ಖ್ಹಾರು ಭರೈನ್ ಉಲ್ಲಾಳಾಯು. ಕತೋಬಿ

ದೇವನೊ ಇರಾದೊ ಇವ್ವಾಪರ್ ಪೂರ ಹೋತುಹುಯಿನ್ ಆಯೊ!

ಪಾಲನೆ ಥೆಸಲೋನಿಕವಾಳಾನ ದೇಖಾನ ಆಖ್ವಾಕರಯ್ಯತೆ

17 ಮಾರ ಭೈಯೇ ಭೇನೆವೊ, ಹಮೆ ಥೋಡದನ್ ತುಮಾರೇಡಿ ದೂರ್ ರಡ್ಡಿಯತೋಬಿ ಮನ್‌ಮ ದೂರ್ ಕರಯ್ಯಕೊಂತೆ ತುಮೂನ ಆಮಖ್ವಾಮೆ ದೇಕ್ಕು ಕರಿ ಹರ್‌ಖ್ವಿನ್ ಘಣು ಕೋಶಿಶ್ ಕರಯ್ಯಾ

18 ಶನಕತೊ ಆವಾನ ಹಮೂನ ಮನ್ ಥೂ, ಪಾಲ ಹುಯಿರಯ್ಯೋತೆ ಮೇಸ್ ಕೆತ್ತೇಕಿಹಲ್ಲ ಪಾಳ್ತು ತುಮಾರಕನ ಆವ್ವುಕರಿ ಕರಯ್ಯೊ ಕತೋಬಿ ಶೈತಾನ್ನೆ ಆವಾನ ಮ್ಹೇಲ್ಯೊಕೊಯ್ನಿ.

19 ಅಪ್ಪೊ ಪ್ರಭು ಹುಯಿರಯ್ಯೋತೆ ಯೇಸು ಆವಾನಿ ವಖ್ವತ್‌ಮ, ಇನಖ್ವಾಮ್ಪೆ ಹಮಾರಿ ಭರೋಖ್ವೊ ಲ್ಹಾಯಕ್, ಖ್ವಿಶಿ, ಅಜ್ಜು ಹಮೆ ಖ್ವಿರಾವನಿ ಕಿರೀಟ್‌ಬಿ ಕೋಣ್? ತುಮೇಸ್ ಕಾಹೆಕಿ ಶು.

20 ಖ್ವಾಚಮಾಬಿ ತುಮೇಸ್ ಹಮಾರಿ ಇಜ್ಜತ್‌ಬಿ, ಖ್ವಿಶಿಬಿ ಹುಯಿರಯ್ಯಾಸ್.

3

1 ಕಡೇಶಿಮ ಹಮೆ ಬಿಜ್ಜು ಜಾಖ್ವತ್ ದನ್ ಟೆವಾವನ ಕೋಹೂಕರಾನಿ ಕರಿ, ಇನಖ್ವಾಜೆ ಮೇ ಎಕ್ಲೋಸ್ ಅಥೇನ್ಸ್‌ಮ ರಡ್ಡವಾನು ಅಛ್ಚುಕರಿ ಸೋಚ್ಚೊ.

2 ಹಮೆ ಹಮಾರ ವಿಶ್ವಾಸ್‌ಮ ಅಜ್ಜು ದೇವ್‌ಖ್ವಾಜೆ ಕ್ರಿಸ್ತನಿ ಸುವಾರ್ತೆನ ಬೋಧನೆಮ ಮಾರ ಜೋಡ್ಡ ರಡ್ಡವಾಳೊ ತಿಮೊಥೆನ, ತುಮೂನ ಹುಮ್ಮಖ್ವ್ ದೈವಾನ ಅಜ್ಜು ವಿಶ್ವಾಸ್ ಹುಮ್ಮಖ್ವ್ ಕರಾನಖ್ವಾಜೆ ತುಮಾರಕನ ಮೋಕ್‌ಲ್ಯಾಥ.

3 ತುಮೂನ ಮಾಲುಮ್ ಛಾಕಿ, ದೇವ್ ನಾಮ್‌ಲ್ಯುತೆ ತಿಮ್ ಖ್ವಿತಾಪ್ಪಿ ಖ್ವಿಮಾಳಿಲ್ಯವಾನು, ಐರಯ್ಯತೆ ದೇವ್ನಿ ಮರ್ಜಿ ಹುಯಿರಯ್ಯೆಸ್.

4 ಶನಕತೊ ತುಮಾರಕನ ಥಾತೆ ತದೆ, ಖ್ವಿತಾಪ್ಪಿನ ಖ್ವಿಮಾಳಾನುಸ್‌ಪಡ್ಚು ಕರಿ ಪಹಿಲೇಸ್ ಬೋಲ್ಯಾಥಾನಿ. ಇಮ್ಮಸ್‌ಹುಯು ಕರಿ ತುಮೂನ ಅಛ್ಚಿನಿತರ ಮಾಲುಮ್ ಪಡಿರಯ್ಯಾಸ್.

5 ತಿಮೊಥೆನ ತುಮಾರಿ ವಿಶ್ವಾಸ್‌ನಿ ಬಾರೇಮ ಮಾಲುಮ್ ಕರಿಲ್ಯವಾನಖ್ವಾಜೆ ಮೇ ತುಮಾರಕನ ಮೋಕ್‌ಲ್ಯೊತೆ. ಬಿಜು ಜಾಖ್ವತ್ ಥಾಮಾನ ಕೋ ಉಶೇನಿ ಕರಿ ಸೋಚಿನ್, ಮೇ ಇನ ಮೋಕ್‌ಲ್ಯೊತೆ. ಶನಕತೊ ಶೈತಾನ್ನೆ ತುಮೂನ ಶೋದನೆ ಕರಲ್ಯೊತೆ ಇನೇಥಿ ಹಮಾರಿ ಮ್ಹಿನ್‌ತ್ ಬಿಣ್‌ಫಾಯಿದಾನು ಹುಯಿಜಾಶೆ ಕರಿ ಮನ ಧಡೂಕೊ ಥೊ.

6 ಕತೋಬಿ ತಿಮೊಥೆ ಹಮ್ಕೆಸ್ ತುಮಾರಕಂಥು ಹಮಾರಕನ ಆಯೊ. ಅಜು ತುಮಾರಿ ವಿಶ್ವಾಸ್‌ಬಿ ಪ್ಯಾರ್‌ನಿ ಬಾರೇಮ ಅಲ್ಹಿ ಖಬರ್‌ನ ಇನೆ ಹಮೂನ ಬೋಲಿನ್, ಕದೆಕದೇಬಿ ಲಾಡ್‌ಥಿ ಖ್ವಿಯಾಲ್ ಕರಿನ್ ಹಮೆ ಕಿಮ್ಕಿ ತಿಮ್ಕೆಸ್ ತುಮೇಬಿ ಹಮೂನ ದೇಖಾನ ಹರ್‌ಖ್ವುಕರ್ತಧ ಕರಿ ಬೋಲಿರಾಖ್ಲೊಸ್.

7 ಹಮಾರ ಭೈಯೆ ಭೇನೆವೊ, ಹಮಾರಿ ಅಖ್ವಿ ಅಜಾಮಾಬಿ, ಖ್ವಿತಾಪ್ಪಿಮಾಬಿ ತುಮಾರಿ ವಿಶ್ವಾಸ್‌ಥಿ ಹಮೂನ ಭಾಲಿಹುಯು.

8 ತುಮೆ ಪ್ರಭುಮ ಘಟ್‌ಥಿ ಜಿವ್‌ಕರಾಸ್ತೆ ಹಮೆ ಖ್ವಿಮ್‌ಜ್ಯಾಕಿ ಹಮೆ ಪಾಳ್ಲು ಹುಮ್ಕಿಹುಯು.

9 ತುಮಾರ ದೇಶಿಥಿ ಹಮುನ ಮಳಿರಲ್ಯಾಸ್ತೆ ಶಂತೋಖ್ವನ್‌ಖ್ವಾಜೆ ಕೆತ್ರ ದೇವ್ವ ಧನ್ಯವಾದ್ ಕರಲ್ಯತೋಬಿ ಬಶ್ ಕೋಹುವಾನಿ.

10 ತಮುನ ಡೋಳೊಖ್ವು ದೇಖಿನ್ ತುಮಾರಿ ವಿಶ್ವಾಸ್‌ನ ಜುರೂರತ್‌ನ ಪೂರಕರಲ್ಯಕರಿ ಹಮೆ ರಾತ್-ದನ್ ಇನಾಮಸ್ ದೇವ್ವ ಪ್ರಾರ್ಥನೆ ಕರುಕರೆಸ್.

11 ಅಪ್ಲೊ ಬಾ ದೇವ್ ಅಜು ಅಪ್ಲೊ ಪ್ರಭು ಹುಯಿರಲ್ಯೊತೆ ಯೇಸು ಹಮೂನ ತುಮಾರಕನ ಆವಾನಟೇಕೆ ಮಾರಗ್‌ನ ಖ್ವುದು ಕರಾದೆ.

12 ತುಮಾರಪರ್ ಹಮಾರಿ ಪ್ಯಾರ್ ಕಿಮ್ಕಿ ಇಮ್ಕೆಸ್ ತುಮಾರಿ ಪ್ಯಾರ್ ಬಿಜಾಪರ್‌ಬಿ ಭಡ್ವಾದೆ ಇಮ್ಕೆಸ್ ತುಮಾರಟೇಕೆ ಹಮಾರಿ ಪ್ಯಾರ್‌ಬಿ ಜಾಖ್ವತ್ ಹುಯಿರಲ್ಯವಾನಿಫೊಣಿ ಪ್ರಭು ಆಶೀರ್ವಾದ್ ಕರಲ್ಯಾದೆ.

13 ಅಪ್ಲೊ ಪ್ರಭು ಹುಯಿರಲ್ಯೊತೆ ಯೇಸು ಕ್ರಿಸ್ತ ಇನು ಪರಿಶುದ್ಧ ಪರಿವಾರ್‌ನಿ ಖ್ವಿಮೇದ್ ಆವಾನಿ ವಖ್ವತ್‌ಮ, ಬಾ ದೇವ್ವ ಖ್ವಾಮ್ಲೆ ತುಮೆ ಪವಿತ್ರಥಿ ಅಜು ಗಲ್ತಿಕೊಂತೆ ಇಮ್ ರಲ್ಯವಾನಿಮತ್ ತುಮಾರ ದಿಲ್ವ

ಖ್ವಾರು ಘಟ್ ಕರಾದೆ.

4

ದೇವ್ವ ಖ್ವಾಜಾತೆ ಜಿವ್ವು

1 ಖ್ವರ್ತಿನಿ ವಾತ್ ಶಾತ್‌ಕತೊ, ಹಮಾರ ಬೈಯೇ ಭೇನೆವೊ ಯೇಸು ಪ್ರಭುನ ಅದಿಕಾರ್‌ಥಿ ತುಮೂನ ಶಾತ್ ಹುಕುಮ್ ದಿದಾಥ ಕರಿ ತುಮೂನ ಮಾಲುಮ್ ಲ್ಹಾ. ತುಮೂನ ಬಿಜ್ಜು ಥೋಡಿ ವಾತೆ ಬೋಲಾನು ಲ್ಹಾ.

2 ಇನಖ್ವಾಜೆ ದೇವ್ವ ಖ್ವಾಜಾನಟೇಕೆ ಕಿಮ್ ಜಿವ್ವು ಕರಿ ಹಮಾರೆಥಿ ಶಿಕಿನ್ ಯೋಸ್ ತರಿಕಾಥಿ ಜಿವ್‌ಕರಾಸ್. ತುಮೆ ಬಿಜ್ಜುಬಿ ಜ್ಞಾಖ್ತ್ ಫಾಲ್ವುಕರಿ ಪ್ರಭು ಯೇಸುಮ ಬಿಂತಿ ಕರಿಯೇಸ್.

3 ದೇವ್ವಿ ಮರ್ಜಿ ಶಾತ್‌ಕತೊ ತುಮೆ ಪವಿತ್ರ ರ್ಲೋಣುಸ್ ಕರಿ. ಇನಖ್ವಾಜೆ ವೈಬಿಚಾರ್‌ಥಿ ದೂರ್ ರ್ಲವೊ.

4-5 ದೇವ್ವ ಮಾಲುಮ್‌ಕರ್ಯ್‌ಕೊಂತೆ ಅಲಕ್ ಅದ್ವಿವೋನಿಫೋಣಿ ಶರೀರಾನಿ ಭೋಗ್‌ಮ ನಾಪಡ್ತೆ ತುಮಾರಮ ಹರೇಕ್ ಜಣು ಪವಿತ್ರ ದಿಲ್‌ಥೀಬಿ ಮರ್ಯಾದಿಥೀಬಿ ಬಾವಣ್ಣಿಜೋಡ್ಡ ಕಿಮ್ ಜಿವ್ವು ಕರ್ನುಕರಿ ಶಿಕಿಲೇವ್ವು.

6 ಅಜ್ಜು ಆ ಬಾರೇಮ ಜಿನುಕು ಕೋಣ್‌ಬಿ ಕ್ರಿಸ್ತನ ಮಹಿ ಇವ್ವ ಬೈಯೇ ಹುಯಿರ್ಲ್ಹಾತೆ ಅದ್ವಿನ ರಗಾವ್ವುಕರಿ ಝೇತ್ಯೆನ್, ಖರಾಬ್ ನಾ ಕರ್ಲ್ವು. ಆ ಖ್ವಾರಿ ಬಾರೇಮ ಪ್ರಭು ನಿಶತ್ ದಿಶೆಕರಿ ಹಮೆ ತುಮುನ ಬೋಲಿರಾಖ್ಯಾಸ್.

7 ದೇವ್ವೆ ಅಪ್ಪನ ಮೈಲುಹುವಾನಖ್ವಾಜೆ ಬುಲಾಯೊಕೊಯ್ವಿ ಪರಿಶುದ್ ಜಿವ್ವು ಕರಾನಖ್ವಾಜೆ ಬುಲಾಯೊತೆ.

8 ಅನಖ್ವಾಜೆಸ್ ಆ ವಾತೇನ ಝಿಟ್ಕಾರವಾಳು ಅದ್ವಿನಾಸ್ ಕಾಹೆತಿ ಪವಿತ್ರಾತ್ಮನ ದಿದೋತೆ ದೇವ್‌ನಾಬಿ ಝಿಟ್ಕಾರವಾಳು ಹುಯಿರ್ಲ್ಹಾಸ್.

9 ಕ್ರಿಸ್ತನ ಮಹಿ ಭಯ್ವೆ ಅಜ್ಜು ಭೇನೇನ ಕಿಮ್ ಪ್ಯಾರ್ ಕರ್ಲ್ವು ಕರಿ ಬೋಲಾನಿ ಬಾರೇಮ ತುಮೂನ ಲೀಖಾನಿ ಜರೂರತ್ ಕೊಯ್ವಿ.

ಏಕಾಢಿಏಕ್ ಪ್ಯಾರ್ ಕರನ್ನ ಕರಿ ಬೋಲಾನಿ ಬಾರೇಮ ತುಮಾರು ತುಮೇಸ್ ದೇವ್‌ಢಿಶಿಕಿರಾಖ್ಯಸ್.

10 ಅಜ್ಜು ಇಮ್ಮಸ್ ಮೆಕೆದೋನ್ಯಮ ಛಾತೆ ತಮಾಮ್ ಬೈಯೆ ಭೇನೇನ ಜೋಡೆ ಪ್ಯಾರ್‌ಢಿ ಚಾಲಿರಾಖ್ಯಸ್. ಕತೋಬಿ ಹಮಾರ ಬೈಯೆ ಭೇನೇವೊ ತುಮೆ ಪ್ಯಾರ್ ಕರಾಮ ಬಿಜ್ಜೂಬಿ ಭಡ್ನುಕರಿ ಬೋಲಿಲಿಯೆಸ್.

11 ಹಮೆ ಬೋಲ್ಯಾತೆ ತಿಮ್ ತು ಬಿಜೇಕ್‌ಚ್ಚಣಾನ ಬಾರೇಮ ಮುಡ್‌ಕ್ಯ ನಕೊಫಾಲ್‌ತೆ ತುಮಾರು ಕಾಮ್ ತುಮೆ ದೇಖಿಲಿನ್ ಖೊಪೇಢಿ ಜಿವ್ಣು ಕರೊಕರಿ ಅಗಾಡಿಸ್ ಬೋಲಿರಾಖ್ಯೊಸ್.

12 ಅಮ್ ಕರನ್ಯತೊ ತುಮೂನ ವಿಶ್ವಾಸ್‌ಮಕೊಂತೆ ಅದ್ವಿಧಿ ಮರ್ಯಾದಿ ಮಳ್‌ಶೆ ಕಾಹೆತೆ ತುಮೆ ಕಿನಾಪರ್‌ಬಿ ವಜ್ಞನ್ ಕೊ ರೆಡ್ತಿಶುನಿ.

ಕ್ರಿಸ್ತಯೇಸು ಪಾಲ್ಟು ಆವ್‌ಶೇತೆ

13 ಹಮಾರ ಬೈಯೆ ಭೇನೇವೊ, ಮರಿಗಯೂತೆ ಅದ್ವಿಧಿ ಬಾರೇಮಾನಿ ಖ್ವಾಚಿನ ತುಮೆ ಮಾಲುಮ್ ಕರಿರಾಕ್ಟಕರಿ ಹಮಾರಿ ಆಖ್ತ್ವ ಅನೇಢಿ ಕೋಣ್‌ಬಿ ಭರೋಖ್ವಾಮಕೊಂತೆ ಅಲಕ್‌ನಿಫೋಣಿ ತುಮೆ ದುಖ್‌ಮ ನಾರ್ಡ್ವೆವ್ಣು.

14 ಯೇಸು ಮರೀನ್ ಜಿವ್ಣೊ ಹುಯೊ ಕರಿ ಅಪ್ಪೆ ಮಾನೇಸ್, ಇಮ್ಮಸ್ ಯೇಸುಪರ್ ವಿಶ್ವಾಸ್ ಕರೀನ್ ಮರಿಗಯೂತೆ ಇವ್ಣುನ ದೇವ್ ಯೇಸುನ ಜೋಡೆ ಉಠಾಡ್‌ಶೆ ಕರಿ ವಿಶ್ವಾಸ್ ಕರನ್ನ.

15 ಹಮ್ಮೆ ಹಮೆ ಶಿಕಾಡುಕರೇತೆ ಆ ವಾತೆ ಪ್ರಭೂನೀಸ್ ಉಪದೇಶ್ ಹುಯಿರ್ದೆಸ್. ಪ್ರಭು ಪಾಲ್ಟೊ ಆವ್‌ಶೇತೆ ವಖ್ವತ್‌ಮ, ಜಿವ್ವಾ ಛಿಯೇತೆ ಅಪ್ಪೆ ಮರಿಗಯೂತೆ ಇವ್ಣೆಢಿ ಪಹಿಲೆ ಕೋ ಜಾಶುನಿ.

16 ಶನಕತೊ ಪ್ರಭು ಇನುಯೋಸ್ ಹುಕುಮ್‌ನಿ ಆವಾಜ್‌ಢಿಲಿಬಿ, ಗಲ್‌ಡೊ ದೂತಾನೊ ಆವಾಜ್‌ಢಿಲಿಬಿ, ಅಜ್ಜು ದೇವ್ನಿ ತುತ್ತೂರಿನ ಆವಾಜ್‌ಢಿಲಿ ಪರ್‌ಲೋಕ್‌ಡು ಉತ್ರಿನ್ ಆವ್‌ಶೆ. ತದೆ ಯೇಸು ಕ್ರಿಸ್ತನಿ ವಿಶ್ವಾಸ್ತು ಮರಿಗಯೂತೆ ಇವ್ಣೆ ಪಹಿಲೆ ಉರಿ ಆವ್‌ಶೆ.

17 ಅನ ಬಾದ್‌ಮ ಜಿವ್ವಾ ಛಿಯೇತೆ ಅಪ್ಪೆ ಪ್ರಭುನ ವಾದ್‌ಳಾನ ವಹಿರಾಮ ಮಳಾನಖ್ವಾಜೆ ಇವ್ಣಿ ಜೋಡೆಸ್ ಏಕ್‌ದಮ್ ವಾದ್‌ಳಾಮ

ಪಡೆಜ್ಜಾಶು. ಅಮ್ ಹುಯಿನ್ ಅಪ್ಪೆ ಹಮೇಶಾನಖ್ವಾಜೆ ಪ್ರಭುನ ಜೋಡೆ ರಡ್ತಿಶು.

18 ಇನಖ್ವಾಜೆ ಆ ಖ್ವಾರಿ ವಾತೆಥಿ ಏಕ್‌ನ ಏಕ್ ಭಾಲಿ ದೆವೊ.

5

ಕ್ರಿಸ್ತ ವಳ್ಳಾವತೆ ಇನಖ್ವಾಜೆ ಖ್ವಾರಿ ರಡ್ತಿವೊ

1 ಹಮಾರ ಬೈಯೇ ಭೇನೇವೊ, ಆ ಖ್ವಾರು ಫಾಲ್‌ಶೇತೆ ದನ್ ಅಜ್ಜು ವಖ್ವತ್‌ನಿ ಬಾರೇಮ ಹಮೆ ತುಮೂನ ಲೀಖಾನಿ ಜರೂರತ್ ಕೊಯ್ನಿ.

2 ಶನಕತೊ ರಾತ್ರಿ ವಖ್ವತ್‌ಮ ಚೋರ್ ಕಿಮ್ ಆವಸ್ತಿ, ಇಮ್ಮಸ್ ಪ್ರಭುನೊ ದನ್ ಆವ್‌ಶೆಕರಿ ತುಮುನಾಸ್ ಅಲ್ಟಿನಿತರ ಮಾಲುಮ್ ಲ್ಹಾ.

3 ಹಮೆ ಶಾಂತಿಥಿ ಲಿಯೆಚ್ಚಿ ಜತನ್‌ಥಿ ಲಿಯೆಚ್ಚಿ ಕರಿ ಅದ್ವಿಖ್ವಾರು ಬೋಲುಕರಾನಿ ವಖ್ವತ್‌ಮಾಸ್, ಬೇಜೂನಿನ ಏಕ್‌ದಮ್ ಪೈದಾಹುವ್ವಾನಿ ಅಜ್ಜ ಆವಾಸ್ತೆ ಇಮ್ಮಸ್, ಇವ್ವಾಪರ್ ನಾಶ್ ಆವ್‌ಶೆ. ಅಜ್ಜ ಇವ್ವೆ ಇನ ಮಹಿಥು ಲ್ಹುಕಿಜಾವನ ಕೋ ಉಶೇನಿ.

4 ಕತೋಬಿ ಹಮಾರ ಬೈಯೇ, ಯೋ ದನ್ ಚೋರ್ ಆವಾನಿಫೋಣಿ ತುಮಾರಪರ್ ಕೋ ಆವ್‌ಶೇನಿ, ಶನಕತೊ ತುಮೆ ಅಂಧಾರಾಮ್* ಕೋ ಜಿವ್‌ಕರಾನಿ.

5 ತುಮೆಖ್ವಾರು ಉಜಾಳ ಭಣಿವಾಳ ಅಜ್ಜ ದನ್ ಭಣಿವಾಳ ಹುಯಿರಡ್ತಿ. ಅಪ್ಪೆ ರಾತ್ ಭಣಿವಾಳ ಕಾಹೆ, ಅಂಧಾರ ಭಣಿವಾಳಬಿ ಕಾಹೆ.

6 ಇನಖ್ವಾಜೆ ಅಪ್ಪೆ ಬಿಜಾನಿಮತ್ ನಿಂದರ್ ನಾಲೇವ್ಣತೆ, ಹೊಷಾರಿ ರಡ್ತಿಯೆ ಅಜ್ಜ ಅಪ್ಪು ಅಪ್ಪೆ ದಾಬುಕ್ಮ ರಡ್ತಿಯೆ.

7 ಖ್ವಾಪ್ಪಾಳು ಖ್ವಾರು ರಾತ್ಮ ಖ್ವಾಪ್ಪಾಸ್. ಕಯೇಪ್ ಚಡ್ವೆಲೆವಾಳು ಖ್ವಾರು ರಾತ್ಮ ಕಯೇಪ್ ಚಡ್ವೆಲೆಸ್.

8 ಕತೋಬಿ ಅಪ್ಪೇತೊ ದನ್ ಭಣಿವಾಳ ಹುಯಿರಡ್ತಿ. ಇನಖ್ವಾಜೆ ಅಪ್ಪು ಅಪ್ಪೆ ದಾಬುಕ್ಮ ರಡ್ತಿಯೆ. ಅಪ್ಪೆ ಪ್ಯಾರ್ ಅಜ್ಜ ವಿಶ್ವಾಸ್‌ನಿ ಕವಚ್‌ನ†

* 5:4 5:4 ಕತೊ ತುಮೆ ಪಾಪ್‌ಮ ಕೋ ಜಿವ್‌ಕರಾನಿ ಕರಿ ಮತ್‌ಲಬ್. † 5:8 5:8 ಕತೊ ಲಡ್ವೆಭಿಡಾನಿ ವಖ್ವತ್ ಲ್ಹಾತಿಪರ್ ಭಾಂದಾನೊ ಪಟೊ

ಛಾತಿಪರ್ ಪೇರ್ದಿಲೇವ್ಣು ಅಜ್ಜು ರಕ್ಷಣೆನಿ ವಿಶ್ವಾಸ್‌ಕರಿ ರ್ವಾನು ಮುಡ್‌ಕ್ಯಾನ್ ಕವಚ್‌ನ್ ಫೇರಿಲೇವೊ,

9 ಶನಕತೊ ದೇವ್ಣೆ ಅಪ್ಪುನ್ ಚೂಣ್ಯೊತೆ ಇನ್ ಇರಾದಮ ಖ್ವಪಡ್ತುಕರಿ ಕಾಹೆ ಪಣಿ, ಅಪ್ಪೊ ಪ್ರಭು ಯೇಸು ಕ್ರಿಸ್ತಧಿ ಮಳ್ಕುತೆ ರಕ್ಷಣೆನ್ ಲೀಲೆವ್ಣು ಕರಿ ಚೂಣ್ಯೊತೆ.

10 ಅಪ್ಪೆ ಜಿವ್ತ ರ್ವಯಾತೋಬಿ ನತರ್ ಮರಿಗಯಾತೋಬಿ ಇನ್ ಜೋಡೆಸ್ ಜಿವ್ಣು ಕರಿ ಬೋಲಿನ್, ಯೇಸುನೆ ಅಪ್ಪಖಾಜೆ ಇನ್ ಜಾನ್ನ್ ದಿದೊ.

11 ಇನ್‌ಖಾಜೆ ತುಮೆ ಹಮ್ಮೆ ಕರುಕರಸ್ತೆ ಇಮ್ಮಸ್, ಏಕ್‌ನ್ ಏಕ್ ಭಾಲಿ ದೇವೊ. ಅಜ್ಜು ಹುಮ್ಮಖ್ ದೇತಹುಯಿನ್ ಏಕ್‌ನ್ ಭಕ್ತಿನ ಬಿಜೇಕ್ ಜಣು ಭಡಾವ್ತರ್ದೆವೊ.

12 ಮಾರ ಭೈಯೆ ಭೇನೇವೊ ಕ್ರಿಸ್ತಮ ಮೆ ತುಮುನ್ ಬಿಂತಿ ಕರುಸ್, ಖಿವು ಅದ್ವಿ ಪ್ರಭುನ್ ಕಾಮ್ ತುಮಾರಖಾಜೆ ಮ್ಹಿನ್‌ತ್ ಕರವಾಳು ಹುಯಿನ್ ತುಮೂನ್ ಅಕ್ಕಲ್ ಬೋಲಸ್ಕಿ,

13 ಇವ್ಣುನ್ ಪರ್ಖಿನ್ ಇವ್ಣು ಕಾಮ್‌ಖಾಜೆ ಘಣು ಮರ್ಯಾದಿ ಅಜ್ಜು ಪ್ಯಾರ್ ವತಾಳ್ಣು ಕರಿ ತುಮೂನ್ ಗಿಂಗೈಲಿಯೇಸ್. ತುಮಾರ ತುಮಾರಸ್‌ಮ ಸಮಾಧಾನ್‌ಧಿ ರ್ವವೊ.

14 ಹಮಾರ ಭೈಯೆ ಭೇನೇವೊ, ಶೊಂಬೇರಿನ್ ಝೇತಾವೊ, ದಿಲ್ಮ ಹೇಬತ್ ರ್ವವಾಳನ್ ಭಾಲಿದೇವೊ, ಕಮ್‌ಜೋರಿ ರ್ವವಾಳನ್ ಆಧಾರ್ ರ್ವವೊ, ಖ್ವಾರಾನ್ ಜೋಡೆ ಘಣಿ ಸಮಾಧಾನ್‌ಧಿ ರ್ವವೊ ಕರಿ ತುಮುನ್ ಉಪದೇಶ್ ಕರುಸ್.

15 ಕೋಣ್‌ಬಿ ಖರಾಬ್‌ನ್ ಬದಲ್ ಖರಾಬ್ ನಾ ಕರ್ನುತೆ ಇಮ್ ದೇಖಿಲೆವೊ. ಕತೋಬಿ ತುಮೆ ಏಕ್‌ಧಿಏಕ್ ಅಜ್ಜು ಹರೇಕ್ ಅದ್ವಿನಾಬಿ ಅಲ್ಪುಕರೊ.

16 ಹಮೇಶ ಖ್ವುಶೀಧಿ ರ್ವವೊ,

17 ಹರ್ ವಖ್ತಮ ಪ್ರಾರ್ಥನೆ ಕರೊ,

18 ಹರ್‌ಹಾಲ್‌ಮ ದೇವ್ನ್ ಧನ್ಯವಾದ್ ಕರೊ. ಆಸ್ ತುಮಾರಿ ಬಾರೇಮ ಕ್ರಿಸ್ತ ಯೇಸುಮ ದೇವ್‌ಮ ಹೋಣುತೆ ಮರ್ಜಿ

ಹುಯಿರ್ದೋಸ್.

19 ಪವಿತ್ರಾತ್ಮನ ಕಾಮ್ನ ಉಝಾವೊ ನಕೊ,

20 ಪ್ರವಾದಾನೇನ ಝಿಟ್ಕಾರೊ ನಕೊ.

21 ಅಖ್ವಾಸ್ನ ತರೀಪ್‌ಶ ಕರಿನ್, ಅಲ್ಟಾನ ಘಟ್ ಧರಿಲೆವೊ.

22 ಖ್ವಾರಿಸ್ ತರ್ದಾನು ಖರಾಬ್‌ಧಿ ದೂರ್ ರ್ದವೊ.

23 ಶಾಂತಿ ದೆವಾಳೊ ದೇವಸ್ ತುಮೂನ ಪೂರಿ ತರಿಕಾಧಿ ಪವಿತ್ರ ಕರಾದೆ. ತುಮಾರು ಆತ್ಮ ಜಾನ್ ಅಜು ಶರೀರ್ ಖ್ವಾರು ಅಪ್ಲೊ ಪ್ರಭು ಹುಯಿರ್ದೋತೆ ಯೇಸು ಕ್ರಿಸ್ತ ದೆಖಾವಾನಿ ವಖ್ವತ್‌ಲಗು ಪೂರ ದೋಷ್‌ಕೊಂತೆ ರಾಖಿಮ್ಲೊ.

24 ಯೋ ಇನ ಕಾಮ್ನ ಪೂರ ಕರ್ಶೆ. ಶನಕತೊ ತುಮೂನ ಬುಲಾಯೋತೆ ಯೋ ವಿಶ್ವಾಸ್‌ವಾಳೊ ಹುಯಿರ್ದೋಸ್.

25 ಭೇನೆ ಭೈಯೇವೊ, ಹಮಾರಖ್ವಾಜೆ ಪ್ರಾರ್ಥನೆ ಕರೊ.

26 ಭೇನೆ ಭೈಯೇನ ಮಳಾನಿ ವಖ್ವತ್‌ಮ ಪವಿತ್ರಧಿ ಹಾತ್‌ಮಳ್ಳೆನ್ ಖ್ವಲಾಮ್ ಕರೊ.

27 ಆ ಚಿಟ್ಟಿನ ಭೈಯೆಖ್ವಾರನ ಪಡೀನ್ ಬೋಲ್ನುಕರಿ ಪ್ರಭುಮ ಬಿಂತಿಕರಿನ್ ತುಮೂನ ಬೋಲ್ನುಕರುಸ್.

28 ಅಪ್ಲೊ ಪ್ರಭು ಹುಯಿರ್ದೋತೆ ಯೇಸು ಕ್ರಿಸ್ತನಿ ವಾರ್‌ಖ್ಲೊ ತುಮಾರ ಜೋಡೆ ರ್ದವಾದೆ.

ದೇವ್ಲಿ ಖಾಘಿ ವಚನ್
The New Testament in the Vaagri Booli language of
India: ದೇವ್ಲಿ ಖಾಘಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವ್ಲಿ ಖಾಘಿ ವಚನ್
ವಿ ಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06